

Makitu ki Pol ndangi adi Kolosi'gi

Ta ki do Makitu ki Pol ndangi adi Kolosi'gi

Makitu kin tanan ki nje ki Pol ndangi adi njekawnan'gi ki Epeji'ti me lo'gi madi'gi'ti: Makitu ki ndangi adi nje ki Kolosi eke nje ki Epeji, Pol ndangi'de kagilo'ti ki in dangay'ti. Ta'gi ki toi me makitu'gi'ti ki joo kin nu, nya'gi ki rai nya kagilo ndangi'de'ti nu taainan.

To toki njendo de'gi nya ki ngom uri dann njekawnan'gi'ti be, rei ki burnanmbukitu dann'de'ti. Kigo nyando'ti la'de, eli toki togi'gi kigo ndil'ti rai kulə ngayn ningə de a ra togi tət'i'de ro, konbe do'de'ti ki row təlro go ndukun'ti la Moji taa. Makitu la Pol el toki ndukun'gi la Moji asi konbe do nyənn'gi'ti la daro de el (2.23). Ki takul koy Ngonn Luwə do kagidəsi'ti kareba ə de a ingə'n kaji (1.20). Njekunme'gi in ngann ro daro ki in njekawnan'gi ki Kirisiti in do'de. Ningə kadi njekunme'gi ndiginan yo ki ne. Ndiginan yo ki ne kin doo'de nan'ti doo ki asi nan berere (3.14-15).

Kon ta'gi ki me'ti: Kandi me ta'ti 1.1-8. Kirisiti inbe ki do'ne me hal'a'ti ki kuləra'a 1.9-2.19. Kisikidotaa ki sigi me Kirisiti'ti 2.20-4.6. Doboy ta 4.7-18.

Kuwə ji nan

¹ M'in Pol ki njekawkulə lə Jeju Kirisiti kigo ndigi'ti lə Luwə, nan'ti ki ngonnkon'je Timote ə ji ndangi makitu kin,

² j'adi'se in de'gi lə Luwə ki sii me be'ti ki Kolosi, in ngannkon'je'gi ki nje ra nya ki low'ə'ti me tɔ Kirisiti'ti. Kadi Luwə ki Baw'je adi'se ramaji ki lapiya.

Pol ra oyo Luwə tado lə Kolosi'gi

³ Ji ra oyo Luwə ki Baw Burəbe lə'je Jeju Kirisiti, dokagilo'gi pəti ki j'isi j'el si'ə ta tado lə'se.

⁴ Ji ra'a oyo tado j'oo poy kunme lə'se ki uni adi Jeju Kirisiti, ki ndigi ki in ndigi de'gi pəti ki in de'gi lə Luwə.

⁵ Kunme ki ndiginan kin, ginn'de in dɔ nya kindəmedɔti lə'se ki Luwə isi ngəm me dɔran'ti adi'se. In gəri nya kindəmedɔti kin ki takul kiləmbər Poyta ki maji ki in ta ki rɔta'ti kin.

⁶ Poyta ki maji kin aw bitɪ te rɔ'se'ti. Ningə asi dɔnangi ba pəti, te ki kandi nya, ə aw ki kete kete toki to'n dann'se'ti kin be tɔ, ulə ngirə me ndɔ'ti inbe ki oyi poyta ki ojido memaji lə Luwə, taa gəri memaji kin toki nya ki rɔta'ti.

⁷ In Epapirasi, ki in madi'je ki ngayn me kulə'ti ə ndo'se nya'gi kin. In de ki nje ra nya ki low'ə'ti me k'in ə njekuləbər lə Kirisiti dann'se'ti.

⁸ Ningə in ə el'je ta dɔ ndigi nan'ti ki Ndil Luwə adi'se.

Kelta ki Luwə tado lə Kolosi'gi

⁹ Be ə, j'in kaa, ndɔ'ti inbe ki j'oo'n poyta lə'se kin, j'inyə ta kelta ki Luwə tado lə'se el. Ji dəj'ə

kadi adi'se gəri ndigi li'ə maji ki takul gosi ki nyagər ki Ndil'ə adi'se.

¹⁰ Lo kin'ti, panjiyə'se a in panjiyə de'gi lə Burəbe ki nəl'ə me nya'gi'ti pəti, a in panjiyə ki aw ki kete kete me kuləra ki maji'ti, ə a tōgi me gər Luwə'ti par par tō.

¹¹ Ji dəji Luwə kadi adi'se tōgi me nya'gi'ti pəti ki takul tōg'ō ki əti bəl, kadi uwəi tōgi'se ba me nya'gi'ti pəti, ki kisidoti ki koreme tō.

¹² Rai oyo Luwə ki Baw'je ki ronel toki adi'se asi kingə nya nduwə ki isi ngəm me bəkon'ti li'ə ki ndolo, tado de'gi ki in yan'a'gi.

¹³ In ə, ər'je ginn tōgi'ti lə lo ki diw, re se'je me Konbe'ti lə Ngonn'ō ki njendigi li'ə.

¹⁴ Ki takul Ngonn'ō kin ə, j'in'n ki taa k'ilə taa, ningə majel'gi lə'je in ki k'inyə go kō tō.

¹⁵ Ngonn kin, in banakum Luwə ki de asi k'oo'ə el. In Ngonn dər nyakində'gi pəti.

¹⁶ Toki rōta'ti, in ki takul'ə ə Luwə ra'n nya'gi pəti ki me dōran'ti num, ki dōnangi'ti ne num tō. Nya'gi ki de oo'de ki kum'ne, ki nya'gi ki de oo'de ki kum'ne el, re in ngar'gi, eke nje konbe'gi ba pəti kaa, ki tōgi ki utə, in ki takul'ə ə Luwə ra'n nya'gi kin pəti num, taa in ki tado li'ə num tō.

¹⁷ Kirisiti in non nyakində'gi'ti pəti. Ningə in ki takul'ə ə, nya'gi pəti ki Luwə ra'de, rai ki dō'de taa tō.

¹⁸ Kirisiti inbe in kibo dō Njekawnan'gi'ti, ki in darō'a. Inbe ə in kulə ngirə nya, in de ki dōkete ki te dann nje koy'gi'ti. Be tado me nya'gi'ti pəti, in ki dōkete.

¹⁹ Tado Luwə ge kadi nya'gi pəti ki rō'ne'ti asi

nan berere ro Kirisiti'ti.

²⁰ Ningə in ki takul Kirisiti ə Luwə ndigi kadi de'gi pəti ki dənangi'ti ne uləi noji nan'ti sə'ne. In ki takul mosi Ngonn'o ki anyi do kagidəsi'ti kin ə, Luwə adi lapiya re'n dənangi'ti ne eke dərən'ti.

²¹ Ningə ingi ki kete in mbah'gi takum Luwə'ti, in njeban'gi li'ə tado ta mərta'gi lə'se, ki nya ra'se'gi ki majel.

²² Nan ngosine Luwə ulə noji nan'ti sese ki takul daro Kirisiti ki gorow koy'o, kadi ra adi tei takum Burəbe'ti to de'gi ki ar njay num, ki kanji yoro num, ta ki kanji ta madi do'se'ti num to.

²³ Ningə, maji kadi rai do nja'se'ti me kunme'ti. Kunme kin ə in ginn kəy ki ngan ki rai do'ti, ki kanji kadi nya madi or'se aw sese sanyi ki nya kindəmedəti lə'se ki Poyta ki maji adi'se kin. Poyta ki maji ki in ki kiləmbər'ə kadi de'gi pəti ki dənangi'ti ne kin. Ningə in ə m'in Pol m'in njerakulə.

Kon lə Pol tado Njekawnan'gi

²⁴ Ngosine, ro'm nəl'm tado kon'gi ki m'nji m'ingə tado lə'se. Toki rəta'ti, me ro'm'ti, ki tado maji lə *Njekawnan'gi ki in daro Kirisiti, m'tolta kon'gi ki nanyi kadi Kirisiti ingə.

²⁵ Ki tado Njekawnan'gi ə m'təl'n njekuləbər lə'de. In Luwə ə ulə kulə kin ji'm'ti kadi m'ra'n sese. Kulə kin in kadi m'iləmbər Poyta ki maji lə Luwə kin ba pəti madi'se.

²⁶ In nya ki to lo kiyə'ti ki ro ginn de'gi'ti pəti ki dokagilo'gi pəti, nan ngosine te ki do adi de'gi lə'ne gəri.

²⁷ Tado Luwə ndigi kadi gəri nya ki oji kadi ra ə in nya ki maji ki əti bol kin. In nya ki k'ində dɔ'a dana tado maji lə de'gi pəti ki in Juwipi'gi el. Nya ki to lo kiyə'ti ki Luwə te ki dɔ'a in Kirisiti ki isi me'se'ti; ki ta kin ə me'se in ki k'ində dɔ toji'ti ki əti bol ki a re.

²⁸ In Kirisiti kin ə, j'isi j'iləmbər Poyta ki maji li'ə ki row ndər mbi de'gi pəti, ki row ndo'de nya ki takul kumkədi ki Luwə adi'je. Tado kadi ingi pəti təli de'gi ki togi gangi me to Kirisiti'ti.

²⁹ Tado kin ə, m'nji m'ra'n kulə num, m'nji rɔ'n num, ki togi Kirisiti ki isi ɔdi rɔ'ne rɔ'm'ti.

2

¹ Toki rɔta'ti m'ndigi ngayn kadi in gəri rɔ ki ngan ngayn ki m'nji m'rɔ tado lə'se, tado lə Lawodise'gi, taa tado lə ndəgə'gi pəti ki oyi m'in ki kum'de el kin to*.

² Rɔ kin, m'rɔ kadi m'ulə'n dingəm me'de'ti, ə kadi indəi rɔ'de nan'ti kareba me ndigi nan'ti, taa kadi ingəi nyagər ki a adi'de me ki tinyi kati, kadi gəri nya lə Luwə ki to lo kiyə'ti, ki in Kirisiti kin num to.

³ In rɔ Kirisiti'ti kin ə de a ingə gosi'gi ki nyagər'gi'ti.

⁴ M'elta kin be kadi de madi ədi'se ur'se ki bal ta ki ta'ne'ti el.

⁵ In ki rɔta'ti, kadi darɔ'm in sanyi sese, nan ndil'm in nan'ti sese. Ningə rɔ'm nəl'm ngayn kadi m'oo'se, rai dɔ nja'se'ti, taa uwəi togi'se ba me kunme kadi Kirisiti'ti to.

Nya'gi pəti in rɔ Kirisiti'ti

* 2:1 2.1 4.13

⁶ Nga ningə, toki taai Jeju Kirisiti, ki Burəbe me'se'ti, maji kadi njiyəi si'ə nan'ti.

⁷ Uləi ngirə'se rə'a'ti, ə adi kisikidotaa lə'se in kəy ki indəi də'a'ti. Ningə kadi rai də nja'se'ti me kunme'ti kigo nyando'ti ki ingəi, ə kadi rai oyo Luwə ki dənən'ti dənən'ti tə.

⁸ Indəi kumkədi də rə'se'ti, kadi de madi ədi'se ki nyagər ki ngom, ki nda'a goto ki in nyagər lə de'gi ki dənangi'ti ne kin el. In nyagər ki ngirə in də nyajibəlbə'ti lə de'gi ki də təgi ndil'gi'ti ki majel ki dənangi'ti ne, um in də Kirisiti'ti el†.

⁹ Tado nya'gi pəti ki rə Luwə'ti, ta'de asi nan berere darə Kirisiti'ti.

¹⁰ Nga ningə ingi ingəi nya'gi kin pəti asi nan rə Kirisiti'ti, nya ki du'se goto. Kirisiti ki in kibo də nje konbə'gi'ti pəti, ki təgi'gi'ti ki utə pəti.

¹¹ In me kində rə nan'ti ki Kirisiti kin ə təli de'gi ki nje kujə mətə'de. Ningə in kujə mətə ki de ə ujə ki ji'ne el, nan in kujə mətə ki Kirisiti inbə ə ujə, kadi ɔri'n nyənn lə darə ki isi aw sese ki majel'ti kin kə.

¹² Ki row lə batəm ki rai, duwi'se nan'ti ki Kirisiti, ningə uni'se nan'ti si'ə taa lo koy'ti tə tado uni me'se də təgi'ti lə Luwə ki te si'ə dann njekoy'gi'ti.

¹³ Ingi ki kete, in de'gi ki koy tado majel'gi lə'se, in de'gi ki in *Juwipi'gi el, ujəi mətə'se el tə, nan ngosine, Luwə təl adi sii kumngayira nan'ti ki Kirisiti. Luwə inyə go majel'gi lə'se pəti kə.

¹⁴ Luwə buji nyara'je'gi ki to me makitu'ti, ki isi səki də'je, taa ɔsi'je taa ki gorow lə ndukun'gi

† 2:8 2.8 Gal 4.3

kin tɔ; Luwə tuji'de kɔ ki gorow ɓər'de dɔ kagidəsi'ti.

¹⁵ In be ə, Luwə ɔr'n tɔgi ndil'gi ki majel ki tɔgi ki isi onyiɓe kɔ‡, ulə rɔsɔl dɔ'de'ti takum de'gi'ti, adi me njiyɔ tɔti rɔ'ti lə Ngonn'o, ki in Kirisiti, njiyɔi to dangay'gi.

¹⁶ Lo kin'ti, adi de madi gangi ta dɔ'se'ti tado nyakusɔ eke nya kanyi el, taa ɔjido ndɔ ko nanyi eke ndɔ kɔrkɔn lə Juwipi'gi el.

¹⁷ Nya'gi kin pɔti in ndil nya'gi ki a rei, nan nya ki rɔta'ti, in darɔ Kirisiti.

¹⁸ Ononyi'se kadi adi de madi tɔl rɔ ki tɔti lə'se kin yan'ne'ti. Adi in de'gi ki njera rɔ'de njedɔ sɔl, isi ɔsi dɔ'de nanga non malayka'gi'ti, in de'gi ki nje k'oo nya ki koo me ninn'ti to nya ki ngayn. In de'gi ki mɔrta lə'de in mɔrta ki ra dɔ'de'ti inɓe par, adi isi indɔi gu'de.

¹⁹ Degə'gi kin, mbeti kuwə ki Kirisiti ki in kibo, in dɔ kin. Nan toki rɔta'ti, in ki takul Kirisiti ki in dɔ kin ə ngann rɔ'gi pɔti ingɔi nya ki kadi ra se'de. In ki takul'ə ə dɔkur'gi ki ngirə'gi sii tanan'ti isi rai kulə. Ningə in Luwə ə in njera kadi darɔ kin tɔgi.

²⁰ Ingi ki koy nan'ti ki Kirisiti, adi'se taa k'inyɔ taa ji tɔgi ndil'gi'ti ki majel ki me dɔnangi'ti. Nga ra bann ə, to toki ji kisikidɔtaa lə'se, sii ginn tɔgi'ti lə nya'gi kin ɓay be wa? Tado ri ə tɔli rɔ'se ginn ndu'gi'ti ki ene:

²¹ «Un nya kin el! Ɔdi nya kin ta'i'ti el! Adi ji ɔdi nya kin el! ...» ɓay wa?

²² Nya'gi kin pɔti in nya'gi ki a tuji kɔ go kulə'ti ki de ra'n. Ningə in mbɔrkikində'gi ki nyando'gi

‡ 2:15 2.15 1.16

kigo nya gəri'ti læ de'gi.

²³ Toki rɔta'ti, kunndu'gi kin, toki oo ə, in nya ki toji gosi, tado toji row kosi do nanga læ de ki ra, row soldo ki row kində togi do daro rɔ'ti, nan k'in ə in ndukun'gi ki nda'de goto, toi tado tol nyənn daro par.

3

Kisikidɔtaa ki sigi ki Kirisiti

¹ Toki uni'se taa lo koy'ti nan'ti ki Kirisiti, maji kadi sangi nya'gi ki taa dɔran'ti, ki in lo ki Kirisiti si'ti, dojikol Luwə'ti kin*.

² Mərɪta do nya'gi'ti ki dɔran'ti, um do nya'gi'ti ki dɔnangi'ti ne el.

³ Tado in de'gi ki oyi, ningə kaji læ'se in ki kiyə nan'ti ki Kirisiti rɔ Luwə'ti.

⁴ Dokagilo ki Kirisiti ki in kisikidɔtaa læ'se a te ningə, ingi kaa a tei si'ə me toji'ti ki taa lo.

Kisikidɔtaa ki kete ki in ki bone

⁵ Maji kadi adi nya'gi pəti ki dɔnangi'ti ne, ki to rɔ'se'ti oyi: adi in sangi nan ki lo kaya'ti, ki nyara ki to njen, ki nyənn læ daro ki əti bol, ki bo nya'gi ki majel, ki ra ta nyakingə, ki in yo ki ra.

⁶ In nya'gi kin ə isi re ki wongi læ Luwə do de'gi'ti ki nje tanrɔ.

⁷ In kin ə, in panjiyə'se'gi ki kete, loki sii me majel'ti bay.

⁸ Nan ngɔsine, maji kadi mbəti nya'gi kin pəti, adi in wongi ki ra, ki nyara ki do togi'ti, ki

* 3:1 3.1 Pa'gi 110.1

mendul, ki nya taji, ki ta'gi ki gorow'ə'ti el ki isi te ta'se'ti.

⁹ Ononyi'se kadi elinan ta ngom. Tado in de'gi ki ɔri koki de ro'se'ti ko, ki kulə ra'a'gi nga.

¹⁰ Ningə ngosine uləi de ki sigi ro'se'ti, de ki Luwə ki njekində nya'gi isi təl'ə ki sigi'ti taa taa, kadi taainan si'ə, kadi te gər'ə'ti ki rəta'ti.

¹¹ Me kisikidətaa'ti ki sigi kin, kər kum nan goto, mbunə de'gi'ti ki in Juwipi'gi eke nje'gi ki in Juwipi'gi el, mbunə njekujəməti'de'gi ki njekujəməti'de'gi el. K'el k'ene mbah eke de ki kum'ə te el, goto, k'el k'ene bər eke de do ro'ne, goto. In Kirisiti par ə in nya'gi pəti me nya'gi'ti pəti.

¹² In de'gi ki Luwə mbəti'se, in de'gi li'ə ki ndigi'se. In tado kin ə, maji kadi ai ki k'oo kumtondoo lə nan ro'se'ti, kadi in nje ramaji, nje sol do'de, kadi in de'gi ki sol lom lom, nje kore me'de.

¹³ Maji kadi sii do'ti ki nan. A re de madi aw ki ta ki to ro'a do ngonkon'ne'ti ə, maji kadi inyəi go ko yo ki ne adi nan, toki Kirisiti inyə'n go majel'gi lə'se ko kin be to.

¹⁴ Nya ki in do nya'gi'ti pəti, in kadi ndiginan in ku ro'se. In ə a ra kadi kində ro nan'ti lə'se a in ki rəta'ti.

¹⁵ Kadi lapiya lə Kirisiti onbe ngarme'se'ti. In tado lapiya kin ə Luwə bari'n'se, kadi in teli daro ki kare. Ningə kadi in njera oyo Luwə.

¹⁶ Maji kadi ta lə Kirisiti rosi me'se ki maji li'ə ki əti bol. Ningə kadi ndoi nan nya'gi ki ndəji nan'gi ki yo ki ne ki gosi ki ngayn. Nga ningə, kadi osipa, uləi toji do Luwə'ti ki oyo ki ra me

Pa'gi'ti, ki me pa kulə dingəm me nan'ti, ki me pa'gi'ti ki Ndil Luwə adi'se.

¹⁷ Nya'gi pəti ki isi rai, ki ta'gi pəti ki isi eli, maji kadi in me tɔ Burəbe Jeju'ti, nga ningə kadi rai oyo Luwə ki Baw ki takul'ə.

Kisi njekunme'gi me kəy'ti

¹⁸ In dene'gi ki nje ngaw, maji kadi uləi dɔ'se ginn tɔgi'ti lə ngaw'se'gi toki maji kadi rai takum Burəbe'ti.

¹⁹ In ngaw dene'gi, maji kadi in ndigi ne'se'gi. Adi rɔ'se ati'se dɔ'de'ti el.

²⁰ In ngann'gi, maji kadi təli rɔ'se go ta'ti lə njekoji'se'gi me nya'gi'ti pəti, tado in nya ki nəl Burəbe.

²¹ Ningə in baw ngann'gi, ononyi'se kadi ndəji ndu ngann'se'gi indəi'de bəl'ti el, tado re in be ə, me'de a tuji.

²² In bər'gi, maji kadi in təli rɔ'se go ta'ti lə be'se'gi'ti ki dɔnangi'ti ne kin. Ningə, ononyi'se kadi rai to kulə kədikum nan taga ne par kadi nəli'de, nan kadi rai ki me ki kare, ki bəl Ndil Burəbe.

²³ Kulə ki to bann ki isi rai ə, kadi rai ki me ki maji to kulə lə Burəbe ə sii rai, um to kulə lə de, el.

²⁴ Ningə kadi in gəri toki Burəbe a adi'se nyamaji ki ngəm tado lə de'gi lə'ne kin, to nyakugə go ji'se. Tado Burəbe ki rɔta'ti in Jeju Kirisiti.

²⁵ Ki rɔta'ti, de ki ra nya ki low'ə'ti el, a tətəi kandi nya ki low'ə'ti el lə'ne kin, tado kər'de dana goto rɔ Luwə'ti.

4

¹ Ingi ki awi ki bər'gi, maji kadi rai'de maji, ki gorow ki dana. Ningə kadi ingi kaa in gəri toki, awi ki Be'se dōran'ti non to.

Ta kɔji ki dɔ kawkulə'ti

² Maji kadi uwəi tɔgi'se ba me kelta'ti ki Luwə, kadi kelta ki Luwə ra adi sii dɔ nja'se'ti, rai oyo Luwə ki dōnan'ti dōnan'ti.

³ Nga ningə, elita ki Luwə ki tado lə'je to, kadi Luwə te tarow non'je'ti kadi j'elta li'ə, kadi j'ilə'n mbər nya ki to lo kiyə'ti ɔjido Kirisiti, ki m'to'n dangay'ti kin.

⁴ Elita ki Luwə kadi m'elta lə Kirisiti kin ar njay, toki maji kadi m'el'n.

⁵ Maji kadi kum'se ədi dɔ panjiyə'se'ti ki rɔ de'gi'ti ki uni me'de adi Kirisiti, el. Ningə kadi dɔkagilo ki Luwə adi'se kin, rai kulə, um adi dər kɔ kare el.

⁶ Maji kadi ta kel'se in ta kel ki maji ki dɔkagilo'gi pəti, ki kadi de ingə nya ki to si'ə soti me'ti. Kadi in gəri lo kuji yəti ta kadi de'gi'ti ki uni me'de adi Kirisiti, el.

⁷ Ngonnkon'm ki njendigi lə'm, Tisiki a el'se ta'gi pəti ki dɔ'm'ti adi oyi. Tisiki* in njekuləbər ki ra dɔ nja'ne'ti, taa in madikulə'm me kulə'ti lə Burəbe num to.

⁸ Nga ningə, m'ul'ə rɔ'se'ti be kadi adi'se poy'je adi oyi num, taa kadi ulə dingəm me'se'ti num to.

⁹ Onejim† ki in ngonnkon'je ki nje ra nya ki low'ə'ti, ki ji ndig'ə ngayn kin, a uwə si'ə row.

* **4:7 4.7 KNK 20.4; Epe 6.21-22** † **4:9 4.9 Plm 10-15**

Onejim in de rɔ'se. Ingi ki Tisiki a eli'se nya'gi pɛti ki isi rai nya rɔ'je'ti ne adi oyi.

Kuwə ji nan ki dɔboy'ti

¹⁰ Madi dangay lə'm Arisitarki‡ uwə ji'se, taa Marki§ ki ngonnann Barnabasi*, ki ingəi takoji'gi ki ɔjido'a kin kaa uwə ji'se tɔ. Re aw te rɔ'se'ti ə, kadi uwəi'ə ki rɔ'se'ti maji.

¹¹ Jeju, ki isi bari'ə Jusitusi uwə ji'se tɔ. Mbunə Juwipi'gi'ti ki uni me'de adi Kirisiti kin, ingi kin par ə sii rai sə'm kulə ki ɔji dɔ konbe lə Luwə. Ingi kin ə in tɔgi'm ki ngayn.

¹² Epapirasi† ki in de lə'se uwə ji'se tɔ. Epapirasi in njekulə lə Jeju Kirisiti, ki inyə ta rɔ el ki tado lə'se, me kelta'ti ki Luwə. Elta ki Luwə kadi rai dɔ nja'se'ti, kadi in de'gi ki tɔgi gangi me Ndil'ti, taa kadi rai dɔ nja'se'ti ba kadi rai ndigira'gi lə Luwə pɛti tɔ.

¹³ M'mannaji lə Epapirasi toki adi rɔ'ne kon ngayn tado lə'se, tado lə Njekawnan'gi ki Lawodise'ti num, taa nje ki Iyerapolisi'ti num tɔ.

¹⁴ Madi'je ki ngayn, Luki, ki in nje ra de'gi monyi ingi ki Dəmasi uwəi ji'se tɔ‡.

¹⁵ Uwəi ji ngannkon'je'gi ki Lawodise'ti, nan'ti ki Nimpa ingi ki Njekawnan'gi me kəy'ti li'ə adi'je tɔ.

¹⁶ Loki tudəi makitu kin ningə, uləi adi Njekawnan'gi ki Lawodise'ti kadi tudəi tɔ. Nga ningə in ki nje ki Lawodise'ti a uləi adi'se kin, in kaa tudəi tɔ.

‡ 4:10 4:10 KNK 19.29, 27.2 § 4:10 4:10 KNK 12.12, 25, 13.13,

15.37-39 * 4:10 4:10 KNK 9.27, 11.22, 30 † 4:12 4:12 1.7

‡ 4:14 4:14 2Ti 4.10, 11; Plm 24

¹⁷ Ningə kadi eli Arsipış adi ində kum'ne go kulə'ti lə Burəbe ki ingə kin, kadi ra kul'ə maji.

¹⁸ Ta kuwəji kin in m'in Pol inbe ə m'ndangi. Kadi me'se oy dɔ'm'ti el, toki m'to dangay'ti ne. Kadi memaji lə Luwə in nan'ti sese. Ta goto nga!

Ta lə Luwə Kunmindɪ kɪ Sigi
New Testament in Gor

copyright © 2014 Wycliffe Bible Translators, Inc.

Language: Gor

Contributor: Wycliffe Bible Translators, Inc.

All rights reserved.

2025-05-03

PDF generated using Haiola and XeLaTeX on 26 Jul 2025 from source files
dated 3 May 2025

2c67456e-bce1-5ef4-9c95-47d2d9335aa4